

## Igl uoppen dalla famiglia HENDRY



El cudisch d'uoppens dil cantun Grischun ei l'arma dalla famiglia HENDRY buca lien. Ins ha tschercau e tschercau leusunter. Ils endisch da schaner 1950 scriva H. Piepenstock, in heraldic dad Estland, carschius si a Turitg e sesents a Losanna, neu dil biro da heraldica svizzer (possessur Raymond Brühlhart) ch'igl uoppen dalla famiglia HENDRY seigi documentaus cun il num

### **A n d r e a s H E N D R Y** **banneret 1619.**

Banneret significhescha „Bannerherr“

Il num HENDRY seigi la pli veglia branscha (lingia). Da HENDRY derivi HENRI en loghens franzos, sco per semeglia ina famiglia a Perly–Certoux (1800–1900) ed ina secunda famiglia ella Alsazia (1823).

Jeu vai giu dubis e biaras damondas osum la bucca – ton che ina entira corrispondenza ei sefatga cun il biro central da heraldica a Losanna. Ed ins ha sincerau a mi garanzia arisguard igl Andreas HENDRY, banneret digl onn 1619. La corrispondenza vai jeu mess d'ina vart; in di vegn jeu a deponer ella egl archiv communal da Tujetsch.

Il num Andreas (Andriu) serepeta facticamein duas ga en las generaziuns dalla schlatteina HENDRY.

Igl uoppen sez ei tshécs: Treis muotas cun in pégn enamiez ed in treifegl da mintga vart che confirman la fritgeivladad dalla tiara. Il verd sin il funs blau, verd e blau – fan endamen e laudan – curascha e perseveranza.

Igl uoppen sco tal (muotas, pégn ed ils dus treifegls eifer la rama) astgan ins buca tucar en; el ei nunmideivels. Tut igl odentuorn perencunter ei sulettamein decoraziun. L'arma digl Andreas HENDRY digl onn 1619 veva la dieua Venus enamiez la cruna dil spitg. Sin mia remarca che la dieua seigi onz niua ha Raymond Brühlhart, il heraldic digl institut a Losanna, reagau immediat. Ins sappi senz'auter schar d'ina vart la dieua Venus e repeter il pégn ella cruna che seigi la part principala digl uoppen.

Ferton ch'igl uoppen dil banneret Andreas HENDRY ei d'in idil campester – ei l'arma englesa d'ina gronda noblezia:



Permiez il scut sefan otg travs entraviars cun la musteila gronda. Colurs: Alv e tgietschen. Orasi dalla capellina sestenda in'amuretta (in aungel cun alas) che tegn in tizun el maun dretg.